



## UNIVERSELE REËLS BY SKIETOEFENINGE

### Inhoudsopgawe:

Item: Beskrywing

1. Algemeen
2. Skietbaanveiligheidsreëls en Standaardbevele
3. Beskerming, ondersteuning en hulpmiddels
4. Gewere
5. Knaldempers
6. Trompremme
7. Inneem van hoër skietposisies en mediese of fisiese beperking
8. Tydperk op die skietpunt vir skuts "om gereed te maak"
9. *Item no vir toekomstige gebruik*
10. *Item no vir toekomstige gebruik*
11. Hantering van ondiensbare wapen
12. Bystand en of afrigting tydens streek of nasionale skietkompetisies
13. Telling
14. Erkenning
15. Gedrag, toerusting, tegnieke of enige iets anders wat nie in die gees van die spesifieke skietoefening is nie
16. Dispuutkomitee
17. Inskietbaan
18. Skietposisies ( lê-, sit-, kniel-, en staanposisies)
19. Inligtingsessies en opleiding van Baanoffisiere/-beamptes voor skietkompetisie
20. Inligtingsessies van deelnemers voor skietkompetisie

## 1. Algemeen

Dié dokument (Universele Reëls by Skietoefeninge) is van toepassing by alle SAJWV jag gebaseerde skietoefeninge.

## 2. Skietbaanveiligheidsreëls en Standaardbevele

Verwys na “Skietbaan veiligheidsreëls vir Deelnemers” en “Standaardbevele op die skietbaan” – dokument: J006.35.02A - vir laai, ontlaai en veiligheidsprosedures.

## 3. Beskerming, ondersteuning en hulpmiddels

### 3.1 Oor- en oogbeskerming

**3.1.1 Oorbeskerming** is verpligtend vir skuts op die skietpunt en ook vir toeskouers binne 15 m van die skietpunt;

**3.1.2 Oogbeskerming (skietbrille)** is verpligtend vir skuts op die skietpunt vanaf 1 Januarie 2016

**3.2 Skietstokke** - skietstokke moet opvoubaar wees, gemaklik in die jagveld saamgedra kan word en moet onafhanklik op drie bene staan vir stabiliteit. Stokke wat tot staanhoogte gebruik kan word (kan ook vir lê, sit en knielhoogte gebruik word) se gewig word beperk tot 'n maksimum van **2.4 kg**, die wat net tot sit/knielhoogte gebruik (kan ook vir lê hoogte gebruik word) kan word, tot **1.4 kg** en die wat net tot lê-hoogte gebruik kan word, tot **0.4 kg**. 'n Haak/stut/verdikking waarop die geweer kan rus mag slegs op een van die bene gebruik word. 'n Kanaal of ander ondersteuning wat die geweer onafhanklik op een poot of bo-oor 'n driepoot kan ondersteun is nie toelaatbaar nie. Opvoubare Harris-tipe tweepoot aanhegtings mag gebruik word ongeag hulle gewig en kan tussen afstande op dieselfde skietoefening aangesit of afgehaal word.

**3.3 Skietstoeltjie** - die gebruik van 'n skietstoeltjie as alternatief word toegelaat vir alle skuts wat nie plat op die grond kan (a.g.v. 'n mediese of fisiese beperking) of wil (a.g.v. voorkeur) sit nie. Die Platinum toekenning tydens die Presidentskietkompetisie sal ook toegeken word aan elke skut wat daarvoor kwalifiseer kragtens die reël - die beperking wat daarvoorheen was i.v.m. die Platinum toekenning, word dus opgehef. Die skietstoeltjie moet opvoubaar en draagbaar wees sonder arm- of rugleunings. Sien alternatiewe sitskietposisies met 'n skietstoeltjie hieronder.

**3.4 Skiettafels** - die gebruik van skiettafels is ontoelaatbaar, behalwe waar die skietoefening dit spesifiek toelaat soos bv. vir ingeperkte persone en by presisie (*benchrest*) skietoefeninge.

**3.5 Geweerbande** - geweerbande mag gebruik word vir ondersteuning en moet op twee plekke aan die geweer bevestig wees – een hegting voor en een agter die snellerbeuel op die geweerkolf so geïmplementeer dat die geweer met behulp van die geweerband op die tradisionele wyse oor die skouer gedra kan word. Die enigste uitsondering is die Swaarkaliber skietoefening waar die gebruik van 'n geweerband nie toegelaat word nie.

### 3.6 Skietbaadjies en skiethandskoene

**3.6.1 ligte jag/skietbaadjies** mag gebruik word. Skyfskietbaadjies (bv. stywe Bisley tipe skiet-baadjies met hake en gespes wat die baadjie styftrek rondom die skut se lyf) wat onprakties is vir jag, word nie toegelaat nie;

**3.6.2 Skiethandskoene** moet lig en buigsaam wees en mag op geen wyse ondersteuning aan die hand en/of gewrig verleen nie;

**3.6.3** Die algemene beginsel vir beide skietbaadjies en handskoene is dat dit slegs beskerming moet bied aan die skut teen koue, ruwe oppervlaktes ens. en in die geval van skiethandskoene ook vir 'n beter greep waar nodig, maar absoluut geen ondersteuning mag bied nie.

**3.7 “Spotting scopes”** - die gebruik van 'n addisionele “spotting scope” deur die skut of 'n toeskouer wat die skut/s met inligting bystaan, word nie toegelaat nie;

**3.8 Laser afstandmeters** (*range finders*) – by veldskietkompetisies – waar die afstande doelbewus onbekend is – word die gebruik van laser afstandmeters nie toegelaat nie. Op skietbane met bekende afstande is afstandmeters onnodig;

**3.9 Windmeters** word toegelaat.

**3.10 Ballistiese programme** op rekenaars/tablette of selfone word toegelaat.

#### 4. Gewere

Semi-outomatiese gewere mag nie by jag gebaseerde skietoefeninge gebruik word nie. Semi-outomatiese 22 Randslaggewere is wel toelaatbaar by alle 22 Randslag skietoefeninge. Die enigste ander uitsondering is skietoefeninge wat spesifiek bedoel is vir semi-outomatiese gewere en dan sal die reëls van die skietoefeninge dit spesifiseer soos bv. die Rooijakkals spoedskietoefening vir semi-outomatiese gewere.

5. **Knaldempers** op gewere is toelaatbaar.

#### 6. Tromprems (*muzzle brakes*) op vuurwapens word nie toegelaat nie

Tromprems op vuurwapens is 'n probleem (dit veroorsaak hoë vlakke van ongerief in terme van klank, "muzzleblast" en dikwels stof) vir naburige skuts. Vanaf 1 Januarie 2016 word die gebruik van tromprems nie toegelaat op skietbane waar georganiseerde tak-, streek- of nasionale skietoefeninge/kompetisies deur takke van die SAJWV aangebied word nie.

Verduidelikende nota: Uit navorsing deur die SAJWV Skietkomitee is dit duidelik dat 'n tromprems op 'n vuurwapen op skietbane waar skuts naby mekaar skiet ernstige probleme, beserings en blywende gehoorverlies kan veroorsaak. Die aanhoorbare klank van die meeste tromprems is meer as tweemaal harder in vergelyking met dieselfde vuurwapen sonder 'n tromprems. Die implikasies is dat standaard gehoorbeskerming meestal nie voldoende is om skuts se ore te beskerm nie. Die artikel en toetse van die navorsing i.v.m. tromprems is beskikbaar by [www.sahunters.co.za](http://www.sahunters.co.za) – Skietsake – Artikels.

#### 7. Inneem van 'n hoër skietposisie en mediese of fisiese beperking

Indien 'n skut nie 'n voorgeskrewe posisie **kan** (a.g.v. 'n mediese of fisiese beperking) of **wil** (a.g.v. voorkeur) inneem nie, mag die skut 'n hoër posisie inneem, maar die hoër posisie mag nie beter ondersteuning as die laer posisie geniet nie. Die skietposisies is van laagste (lê) na hoogste (staan) in die volgende volgorde: lê, sit-, kniel- en staanposisie. Die baanoffisier moet so 'n skut, akkommodeer na gelang van omstandighede, sonder om hom of haar 'n onregverdigde voordeel te bied en sonder om veiligheid op te offer. Indien 'n skut twyfel in die verband moet hy/sy voor die aflossing begin skiet aan die baanoffisier rapporteer, wat dan 'n beslissing sal maak en die ander skuts in die aflossing sal inlig indien enige ander vergunning toegestaan word.

Voorbeeld: Skut **wil** of **kan** nie die lê posisie met ondersteuning slegs voor inneem nie (bv. die Vlake skietoefening op 200m in die lê posisie met beperkte ondersteuning slegs voor – item 18.1.2) en verkies die sitposisie. Die skut kan dan slegs die hoër skietposisie (bv. die sitposisie) inneem met 'n soortgelyke enkele ondersteuning. Sien item 3.3 in verband met die spesifieke gebruik van 'n skietstoeltjie in die sitposisie as alternatief.

#### 8. Tydperk op die skietpunt vir skuts "om gereed te maak"

Na die bevel "neem skietposisie in en verstel visiere/teleskope" gegee is, het skuts maksimum 2 minute om gereed te maak vir die bevel "laai en maak gereed". Die tyd kan verkort word mits al die skuts aangedui het dat hulle gereed is, by bv. die Grootkaliber skietoefening waar dit dikwels nie so lank neem om gereed te maak nie. Hierdie reël het die doel om onnodige verspeling van tyd deur skuts op die skietpunt, te beperk.

#### 9. Item no vir toekomstige gebruik

#### 10. Item no vir toekomstige gebruik

#### 11. Hantering van 'n ondiensbare vuurwapen

'n Skietoefening moet met een geweer voltooi word. Geen deelnemer mag sy vuurwapen wissel met 'n ander vuurwapen gedurende 'n skietoefening nie, tensy die vuurwapen ondiensbaar raak a.g.v. 'n onderdeel wat breek of onklaar raak en nie doelbewus deur die skut veroorsaak is nie. Die Baanoffisier moet bevestig dat die vuurwapen wel ondiensbaar is alvorens die skut toegelaat word om 'n nuwe wapen te gebruik.

'n Ondiensbare vuurwapen is 'n wapen wat nie gelaai, onklaai of afgevuur kan word op 'n normale wyse nie en potensieel gevaarlik kan wees vir die skut en omstanders. 'n Vuurwapen wat geval het of gestamp is en die visiere of teleskoop is sodanig beskadig dat die Baanoffisier dit visueel kan waarneem word ook as ondiensbaar geklassifiseer. Ander voorbeelde van ondiensbare wapens is: 'n dop wat in die kamer vassit of afgebreek het of 'n sneller wat onverwags "lig" afgaan wanneer die grendel gesluit word.

Die skut moet toestemming vra en kry by die Baanoffisier om 'n tweede vuurwapen te gebruik. Bv. op die Bosveldskietoefening breek die dop af in die geweer se kamer met die tweede skoot op die 100m staan oefening. Die skut vestig die Baanoffisier of Baanbeampte se aandag op die probleem. Die Baanoffisier bevestig dat die vuurwapen ondiensbaar is en die skut kry toestemming om vir die oorblywende oefening op 50m 'n ander geweer te gebruik. Die twee skote nie geskiet op die 100m oefening nie verbeur die skut vir tellingdoeleindes.

Enige skoot wat tydens die skietoefening in 'n veilige rigting afgevuur is, al het die skoot afgegaan as gevolg van bv. 'n foutiewe sneller, sal vir telling doeleindes as 'n kwalifiserende skoot beskou word.

Twee skuts mag nie dieselfde vuurwapen in dieselfde aflossing gebruik indien 'n vuurwapen ondiensbaar raak nie. Hierdie is 'n praktiese reëling om die ontwriging van die ander skuts te verhoed.

## 12. Bystand en/of afrigting tydens streek of nasionale skietkompetisies

Afrigting of bystand tydens streek of nasionale skietkompetisies word nie toegelaat nie. Die enigste uitsonderings is die volgende:

**12.1** Die skuts op die skietpunt mag met mekaar kommunikeer (bv. in spanverband) maar die kommunikasie mag nie ander skuts ontwrig nie. Skuts mag nie met nie-skuts kommunikeer nie.

**12.2** Gedurende junior skietkompetisies (luggeweer en 22 Randslag gewere) waar 'n junior met die Baanoffisier se toestemming en in sy uitsluitlike oordeel fisies bygestaan mag word deur 'n volwassene, maar geen afrigting word toegelaat nie. Indien 'n junior op streek of nasionale vlak deelneem is die algemene reël dat hy of sy ervare genoeg moet wees om die skietoefening sonder fisiese hulp te voltooi. Dit is onder andere belangrik dat die geweer geskik is vir gebruik deur die junior en nie bv. te swaar of op enige ander wyse onhanteerbaar is nie.

**12.3** Gedurende deelname deur 'n ingeperkte skut, mag hy/sy fisies bygestaan word om in posisie te kom tot op die skietpunt en die skut mag verder bygestaan word op die skietpunt indien nodig geag en in die uitsluitlike oordeel van die Baanoffisier, maar geen afrigting word toegelaat nie.

## 13. Telling

**13.1 Lynskote** - Indien 'n skoot 'n lyn tussen twee aangrensende tel-areas op die teiken raak, kry die skut die voordeel van die hoër telling. Indien die lyn egter tussen 'n minus en nul geraak word, tel die minus want dan is die bok gekwes. Die lyn moet net geraak wees en hoef nie heeltemal gebreek te wees nie. Geen koeëls of ander voorwerpe mag in die gat gedruk word nie.

**13.2 Kaliber meetplaatjie** - Indien daar twyfel bestaan moet die standaard SAJWV kaliber meetplaatjie (*caliber gauge*) gebruik word om te bepaal of 'n skoot die lyn raak of nie. Die lyne van die sirkels op die kaliber meetplaatjie vir die verskillende kalibers se buitedeursnee is kalibergrootte en indien die lyn van die sirkel wanneer gesentreer oor die koeëlgat, die lyn op die teiken raak, dan word die telling bepaal as 'n skoot wat die lyn raak.

**13.3 Skoot na die tyd geskiet** - Indien 'n skoot ná die bevel "stop" geskiet word, verloor die skut die hoogste punt op die teiken.

**13.4 Te veel skote op die teiken** - In die geval waar daar te veel skote op 'n teiken is, moet die baanoffisier eers bepaal of daar skote kort op die omliggende teikens. Indien wel, moet daar eerstens probeer word om onderskeid volgens kaliber te tref. Indien dit moontlik is, word die teiken met die ekstra skoot/skote se telling bereken na die ekstra skoot/skote weggelaat is. Indien dit nie moontlik is om die onderskeid volgens kaliber te tref nie, word eerste die laagste telling afgetrek, daarna die hoogste en dan weer die laagste totdat al die oortollige skote verreken is. Indien die skut voel dat hy benadeel word, kan hy versoek om die oefening oor te skiet. Die persone wat op verkeerde teikens geskiet het, verbeur die skote.

Indien daar egter te veel skote op 'n teiken is, en niemand kort enige skote in die omgewing nie, en die kalibers kan nie onderskei word nie, dan word die hoogste tellings verminder totdat die korrekte aantal skote op die teiken oorbly. Die skut het in die geval nie die keuse om die oefening oor te skiet nie.

## 13.5 Uittel van wenners met gelyke tellings tydens skietkompetisie

**13.5.1** stap 1 – gebruik die aantal v-kolle om uit te tel per skietoefening, daarna

**13.5.2** stap 2 - gee meer waarde aan die skietoefening op die langste afstand indien gelyke totale wedstrydtellings, daarna

**13.5.3** stap 3 - indien die wenner steeds nie bepaal kan word nie, kyk dan watter skut het die minste lynskote (enige skoot wat 'n lyn raak)

**13.5.4** Item 13.5.1 en 13.5.2 is programmaties ingebou in die SAJWV rekenaarprogram vir punteverwerking. Indien die program steeds nie kan onderskei nie, moet die lynskote vir die betrokke teikens per hand getel word om die wenner te bepaal – die skut met die minste lynskote kry die voordeel.

## 14. Erkenning

Slegs die eerste skietoefening op 'n dag kwalifiseer as 'n erkende kwalifiserende telling vir registrasie (op die taktabelt of andersinds) en 'n moontlike skietbalkie – 'n tweede en daaropvolgende pogings se resultate geld nie. Die gebruik van 'n sub-kaliber om eers 'n skietoefening te skiet en om daarna op dieselfde dag 'n kwalifiserende skietoefening te skiet met 'n volwaardige kaliber is ook nie toelaatbaar nie. Bv. die gebruik van 'n 308 Win in 'n oefensessie en daarna 'n swaarkaliber wat kwalifiseer vir die Swaarkaliber skietoefening is nie toelaatbaar nie.

**15. Gedrag, toerusting, tegnieke of enige iets anders wat nie in die gees van die spesifieke skietoefening is nie** - Enige gedrag, toerusting, tegnieke of enige iets anders wat volgens die baanoffisier nie in die gees van 'n spesifieke skietoefening is nie, onveilig is of ander skuts verontrief mag deur die Baanoffisier verbied word. Indien daar twyfel in die verband bestaan, moet dit met die Skietkomitee uitgeklaar word.

**15.1 Warmmaaskote** (opwarmskote) net voor of tydens die skietoefening word nie toegelaat nie! Wanneer die skut op die skietpunt aantree vir die skietoefening word net die gespesifiseerde hoeveelheid skote volgens die reëls van die skietoefening direk op die teiken toegelaat.

**15.2 Spesifieke reëls i.v.m. toerusting:** Die volgende spesifieke reëls geld in verband met toerusting op die skietbaan:

- 15.2.1** Geen harde oppervlakte soos 'n houtplank, plastiek- of metaalplaat ens. is toelaatbaar op die skietpunt as rus vir skietstok of Harris tipe "bi-pod" of "monopod" nie. Die skietmat moet buigbaar en opvoubaar wees;
- 15.2.2** Die skietmat of gewearsak mag verder gebruik word in die sit of knielposisie om 'n sagte oppervlakte vir beskerming te skep om op te sit of te kniel (bv. onder die knieë), maar dit mag nie gebruik word vir ondersteuning of om die wapen te stut nie.
- 15.2.3** 'n Normale skut (geen ligaamlike beperking) se toerusting moet van so 'n aard wees dat hy/sy in staat is om self al sy toerusting vir een skietoefening op die skietbaan te dra van een skietpunt na die volgende. 'n Senior persoon of 'n ingeperkte skut kan deur 'n helper bygestaan word.

**15.3 Dissiplinêre optrede teen skuts wat veiligheids-, skietoefening- of kompetisiereëls oortree of hom/haar nie aan die bevel van die Baanoffisier onderwerp nie – verwys na item 15 van die Handleiding vir baanoffisiere:**

- 15.3.1** Onveilige optrede deur 'n skut – in die geval van onveilige optrede deur 'n skut, maak die Baanoffisier die besluit en sy beslissing is finaal.
- 15.3.2** Die volgende oortredings moet in die oordeel van die Baanoffisier op die telkaart aangeteken word as "voorlopig" met 'n beskrywing van die oortreding en verwys word na die Dispuutkomitee vir 'n beslissing:
  - a) Oortreding van 'n skietoefening- of kompetisiereël en/of
  - b) doelbewuste oortreding van kompetisiereëls deur 'n skut om hom/haarself te bevoordeel.

**16. 'n Dispuutkomitee** bestaande uit 3 lede moet saamgestel (aanstelling reeds twee tot drie dae voor die skietkompetisie om die lede geleentheid te gee om voor te berei indien nodig) word en die lede moet almal gereelde en ervare skuts en Baanoffisiere wees wat die skietoefening- en skietkompetisiereëls goed ken om hulle in staat te stel om dispute effektief te kan hanteer:

- 16.1** 'n Skut op die dag van die skietkompetisie kan lid wees van die Dispuutkomitee, as lid van die Dispuutkomitee mag hy/sy dan nie aan die beslissing oor 'n dispuut t.o.v. sy eie teiken/deelname of 'n individu of span waarby hy/sy 'n belang het, deelneem aan die besluit nie. In so 'n geval onttrek die Dispuutkomitee lid tydelik uit die komitee en die oorblywende lede van die Dispuutkomitee (Dispuutkomitee moet altyd bestaan uit ten minste 3 lede – altyd 'n ongelyke getal) wys 'n addisionele lid aan vir die hantering van die spesifieke dispuut. By afhandeling van die dispuut, word die tydelike lid verskoon en keer die oorspronklike lid terug na die Dispuutkomitee.
- 16.2** I.g.v. 'n dispuut moet die teiken na die Dispuutkomitee gaan (indien 'n teiken betrokke is by die dispuut), die skut moet geleentheid kry om sy kant van die saak te verduidelik en dan word hy/sy verskoon. Die Dispuutkomitee bespreek die geval *in camera* (privaat), sonder die skut teenwoordig, maak 'n besluit en kondig dit aan. Die Dispuutkomitee se besluit is finaal en nie onderhandelbaar nie.

## 17. Inskietbaan

By streek en nasionale kompetisies moet daar 'n 100 meter inskietbaan op die dag van die kompetisie voor aanvang van die kompetisie beskikbaar wees. Skuts moet minstens 10 minute totale inskiettyd toegelaat word vir al sy wapens. Inskiet word slegs op 100m toegelaat selfs al laat die betrokke skietbaan langer afstande toe en geen skote mag op afstande verder as 100m geskiet word nie na bv. teikens, klippe of enige ander voorwerpe nie.

## 18. Skietposisies

**18.1 Lê skietposisies** word gebruik om toestande in die jagveld te simuleer waar dit moontlik is om te lê en skiet en daar nie bv. gras of ander voorwerpe in die pad is nie:

18.1.1 **Lê posisie sonder enige bykomende ondersteuning** (bv. skietstokke) – uit hierdie posisie is die ondersteuning vanaf die elmboë en mag die geweer, enige hand, pols of voorarm glad nie die grond of enige ander voorwerp raak nie. 'n Geweerband mag gebruik word. Bv. die Rooibok skietoefening sonder ondersteuning op 200m



18.1.2 **Lê posisie met beperkte ondersteuning slegs voor** - Skietstokke met 'n enkele steunpunt of 'n Harris-tipe tweepoot mag die geweer slegs voor die snellerbeul ondersteun. Die skut se nie-sneller hand mag die geweer slegs voor die snellerbeul vashou en die geweer, enige hand, pols of voorarm mag nie aan die grond of enige ander voorwerp (bv. een been van die skietstok) raak nie. Bv. die Vlakte skietoefening met ondersteuning slegs voor op 200m.



Alternatief met "Harris – bipod"

- 18.1.3 **Lê posisie met beperkte ondersteuning voor en agter** – Harris tipe tweepoot of skietstokke mag gebruik word om die geweer voor te ondersteun. 'n “Monopod” (’n opvoubare addisionele rus wat agter vas is aan die kolf), of die tweede poot van skietstokke mag gebruik word om die geweer agter te ondersteun. Die ondersteunende hand mag die kolf agter vashou en die kolf mag die grond agter raak. Sandsakke of enige ander tipe toerusting is nie toelaatbaar nie. Bv. die Vlakke skietoefening met beperkte ondersteuning voor en agter op 300m.



- 18.1.4 **Lê posisie met vrye ondersteuning voor en agter** en enige tipe rus mag die geweer apart voor en agter ondersteun. Vaste inskietrame is egter nie toelaatbaar nie. Bv. die 300m Jakkals skietoefening met vrye ondersteuning voor en agter.



Toelaatbaar: sandsakke agter onder die kolf

**18.2 Sit-skietposisies** word gebruik om toestande in die jagveld te simuleer waar die skut 'n hoër skietposisie moet inneem om bv. bo-oor gras of ander voorwerpe te skiet en die lê posisie te laag is:

18.2.1 **Sitposisie sonder enige bykomende ondersteuning** (bv. skietstokke) – Dit is toelaatbaar om die elmboë op die knieë te stut en 'n geweerband is ook toelaatbaar. Die skoene van 'n skut mag op geen wyse as dooierus dien vir die geweer nie. Die gewig van die liggaam van die skut word slegs ondersteun deur die sitvlak (boude), voete en enkels. Geen ander deel van die liggaam, soos enige deel van die arms of knieë en bobene mag die grond raak nie. Die skokkussing ("recoil pad") van die geweerkolf moet teen die skouer of bo-arm (*biceps muscle*) druk en nie teen die waaier van die been of enige ander plek nie. Verder kan die skut sy liggaam gebruik na die beste van sy oordeel sonder enige beperking, behalwe waar die baanoffisier dit onveilig ag. Bv. die Rooibok en Vlake skietoefeninge sonder ondersteuning op 100m.



Alternatief: kolf teen bo-arm (*biceps muscle*)

**Alternatiewe sitposisie op skietstoeltjie sonder enige bykomende ondersteuning** – Bv. die Rooibok skietoefening op 'n skietstoeltjie sonder ondersteuning op 100m.





- 18.2.2 **Sitposisie met beperkte ondersteuning slegs voor vir jaghandwapens** - Vanuit hierdie sitposisie mag die wapen slegs op 'n enkele punt deur die skietstokke ondersteun word. Tweepote wat aan die wapen vas is, is nie toelaatbaar nie. Hierdie reël is spesifiek van toepassing op die Jaghandwapen skietoefening met beperkte ondersteuning op 50m.



- Alternatiewe sitposisie op skietstoeltjie met beperkte ondersteuning slegs voor vir jaghandwapens** – bv. die Jaghandwapen skietoefening met beperkte ondersteuning op 50m.



- 18.2.2 (a) **Sitposisie met ondersteuning slegs voor** - Skietstokke met 'n enkele steunpunt of 'n Harris-tipe tweepoot mag die geweer slegs voor die snellerbeuel ondersteun. Bv. die Vlakke (Swartwildebees) skietoefening op 200m.



Alternatief met skietstoeltjie

- 18.2.3 **Sitposisie met vrye ondersteuning** - met hierdie gesteunde sitposisie kan die skut sy skietstokke of Harris tipe tweepoot gebruik na die beste van sy oordeel (kan ook meer as een poot van die skietstok benut) sonder enige beperking, behalwe waar die baanoffisier dit onveilig ag. Dit is toelaatbaar om die elmboë op die knieë te stut en 'n geweerband is ook toelaatbaar. Die elmboë, enige deel van die arms of knieë mag nie die grond raak nie en die geweer kolf moet in die skouer wees. Bv. die Vlake skietoefening met vrye ondersteuning op 200m.



Alternatief met "Harris bipod"

**Alternatiewe sitposisie op skietstoeltjie, maar met slegs een steunpunt op skietstokke** - Bv. die Vlake skietoefening met 'n skietstoeltjie, maar met slegs een steunpunt op skietstokke op op 200m.



**18.3 Kniel skietposisies** word gebruik om toestande in die jagveld te simuleer waar die skut "n hoër skietposisie moet inneem om bv. bo-oor gras of ander voorwerpe te skiet en die sit posisie te laag is:

18.3.1 **Vryhand knielposisie** – geen bykomende ondersteuning (bv. skietstokke) word gebruik nie. In die posisie moet die voet van die been wat die ondersteuning verskaf met die sool en hak plat op die grond geplaas word. Die agterste voet waarop "gesit" word mag regop wees of plat gedraai word en die knie moet die grond raak. Een elmoog mag op 'n knie ondersteun word, die ander moet vry van ondersteuning wees. Die elmoë of boude mag nie die grond raak nie. 'n Skut mag egter ook met beide knieë op die grond staan. Bv. die Vlakvark skietoefening waar die vryhand knielposisie op 75m een van die drie opsies is.



Alternatief - kniel op beide knieë

18.3.2 **Knielposisie met vrye ondersteuning** - knielposisie soos hierbo beskryf in item 18.3.1, maar die skut kan skietstokke gebruik na die beste van sy oordeel (kan ook meer as een poot van die skietstok benut) sonder enige beperking, behalwe waar die baanoffisier dit onveilig ag. Bv. die Bosveld skietoefening in die knielposisie met vrye ondersteuning op 150m.



Alternatief – kniel op beide knieë

**18.4 Staan skietposisies** word gebruik om toestande in die jagveld te simuleer waar daar Gewoonlik vinnig geskiet moet word oor relatief kort afstande en/of die skut 'n hoër skietposisie moet gebruik om bv. bo-oor gras, bosse of ander voorwerpe te skiet en die sit/lê of kniel posisie te laag is:

18.4.1 **Vryhand staanposisie** – geen bykomende ondersteuning (bv. skietstokke) word gebruik nie en verder gebruik die skut die staanposisie soos dit hom/haar pas. 'n Geweerband is toelaatbaar. Vanuit die vryhand staanposisie kry die skuts die bevel *“Almal is gereed – sluit grendel en staan by”* - skuts wag op die bevel *“vuur”* met die snellervinger langs die snellerbeuel, met die geweer-loop ongeveer 45 grade na die grond gerig en die tromp (punt) van die geweerloop mag nie hoër as die skut se lyfband (“belt”) wees nie. Hierdie posisie geld vir alle skietoefeninge met 'n geweer in die vryhand staanposisie behalwe die swaarkaliber skietoefening waar die gebruik van 'n geweerband nie toegelaat word nie – sien item 18.4.2.



“Gereed”



“Vuur/skiet”

**18.4.1 (a) Standaardbevele op die skietbaan vir die vryhand staanposisie – 3 snapskote:**

**Nota:** As gevolg van die tydsdruk vir elke skoot op skuts gedurende die snapskoot skietoefening is dit belangrik dat duidelike en eenvormige bevele deur Baanoffisiere gegee word om verwarring by die skuts te voorkom. Die oefening word beskou as 'n toets van die skut se vaardigheid sowel as sy toerusting se betroubaarheid. 'n Storing veroorsaak potensieel dat punte verbeur word aangesien die aflossing nie gestop sal word indien enige skut 'n storing ontwikkel na die eerste bevel om te *“vuur”* gegee is nie.

1. Die bevele tot en met item 6 van “Standaard bevele” bly dieselfde en daarna:
2. **“Laai en maak gereed”** (laai magasyn met 3 rondtes/ kamer van enkelskoot vuurwapens en grendel bly oop) (nota: dit is onnodig om skuts met magasynne een skoot per keer te laat laai maar hou steeds beperking van skuts met enkelskoot gewere in gedagte)
3. **“Is almal gereed?”** – skuts wat nie gereed is nie moet aanduiding gee
4. **“Die aflossing is nog nie gereed nie”** – indien so aangedui.
5. **eerste skoot:**
- 5.1 Vanuit die vryhand staanposisie kry die skuts die bevel **“Almal is gereed –sluit grendel en hou die geweer op 45 grade”** – (2 sekonde pause) - **“staan by”** – (2 sekonde pause) (item 10 van standaardbevele) - skuts wag op die bevel *“vuur”* met die snellervinger langs die snellerbeuel, met die geweer-loop ongeveer 45 grade na die grond gerig en die tromp (punt) van die geweerloop mag nie hoër as die skut se lyfband (“belt”) wees nie;


Nota: tydsverloop vanaf “Almal is gereed – sluit grendel en hou die geweer op 45 grade” na “Blaas fluitjie” of gee bevel “vuur” nie langer as 2 sekondes nie. Skuts moet nie onnodig lank in die posisie laat staan word nie aangesien dit uiters frustrerend en vermoeiend is – hou ook in gedagte die skuts staan met ‘n gelaaide geweer. ‘n Skut wat nie gereed is vir die tweede en derde skoot nie, verloor die oorblywende skoot/skote. Bevele word nie onderbreek nie, en die tweede en derde skoot gaan aan.

- 5.2 “Blaas fluitjie” of gee bevel “vuur”;
- 5.3 Na 5 sekondes: “Blaas fluitjie” of gee bevel “stop”;
- 5.4 Skuts mag herlaai onmiddellik na skoot geskiet is
6. tweede skoot – gee genoeg tyd vir laai deur skuts met enkelskoot gewere (maks 12 sekondes):
  - 6.1 “herlaai en hou die geweer op 45 grade” – (2 sekonde pouse)- “staan by” (2 sekonde pouse) ;
  - 6.2 “Blaas fluitjie” of gee bevel “vuur”;
  - 6.3 Na 5 sekondes: “Blaas fluitjie” of gee bevel “stop”;
  - 6.4 Skuts mag herlaai onmiddellik na skoot geskiet is
7. derde skoot – gee genoeg tyd vir laai deur skuts met enkelskoot gewere (maks 12 sekondes):
  - 7.1 “herlaai en hou die geweer op 45 grade” - (2 sekonde pouse)- “staan by” (2 sekonde pouse);
  - 7.2 “Blaas fluitjie” of gee bevel “vuur”;
  - 7.3 na 5 sekondes “Blaas fluitjie” of gee bevel “stop”;
8. Bevele vanaf item 13 van standaardbevele - “Ontlaai, maak veilig” – word dan verder gebruik

18.4.2 Vryhand staanposisie vir Swaarkaliber gewere, die gebruik van ‘n geweerband word nie toegelaat nie. Bv. die Swaarkaliber skietoefening in die vryhand staanposisie op 25 en 50m.



“Gereed”



alternatief “Gereed”



“Vuur/skiet”

18.4.3 **Vryhand staanposisie met 'n jaghandwapen** – geen ondersteuning (bv. skietstokke) word gebruik nie. Bv. Jaghandwapen skietoefening in die vryhand staanposisie op 25m.



“Gereed”



“Vuur/skiet”



Nie toegelaat nie

18.4.4 **Staanposisie met vrye ondersteuning** - met hierdie gesteunde staanposisie kan die skut skietstokke gebruik na die beste van sy oordeel (kan ook meer as een poot van die skietstok benut) sonder enige beperking, behalwe waar die baanoffisier dit onveilig ag. Bv. die Bosveld skietoefening in die staanposisie met skietstokke, vrye ondersteuning op 100m.



18.4.5 **Staanposisie met beperkte ondersteuning slegs voor** - die jagwapen mag slegs op 'n enkele punt deur die skietstokke ondersteun word. Die reël is spesifiek van toepassing by die Vlakvark skietoefening in die staanposisie met beperkte ondersteuning op 75m.



Alternatief bo-oor skietstokke

## 19. Inligtingsessies (*briefing sessions*) ter voorbereiding van Baanoffisiere/beamptes vir skietkompetisies

Belangrik: Indien daar voor 'n kompetisie enige twyfel bestaan oor die detail kennis van baanoffisiere/ beamptes oor onderstaande reëls, dan moet die Hoofbaanoffisiere vooraf (nie die oggend van die kompetisienie) 'n opleidingsessie reël om te verseker dat die baanoffisiere en baanbeamptes die reëls ken en verstaan. Baanoffisiere wat onseker is oor reëls op die dag van die skietkompetisie dra by tot verwarring van en ontevredenheid by skuts.

- 19.1 Bevestig dat baanoffisiere elkeen 'n kopie van die volgende in sy besit het en detail kennis van die volgende reëls het:
  - 19.1.1 Universele Reëls by skietoefeninge - dokument: J006.34.05A - Uitgereik: Mei 2016
  - 19.1.2 Skietkompetisiereëls vir die dag:
    - 19.1.2.1 UITDAAG Spanskietkompetisie - SAJWV Liga skietkompetisies - skietoefening vir die UITDAAG Spanskietkompetisie - Dokument: J006.57.01A - Uitgereik: Desember 2015
    - 19.1.2.2 Intertak Spanskietkompetisie en/of Presidentskietkompetisie - SAJWV Liga skietkompetisies – skietoefening vir die President- en Intertak Spanskietkompetisies - Dokument: J006.38.02A - Uitgereik: Desember 2015
    - 19.1.2.3 Junior skietkompetisies bestaande uit Luggeweer en/of 22 Randslag skietoefeninge – Dokumente: J006.41.02A, J006.42.02A, J006.43.02A, J006.44.02A, J006.45.02A, almal uitgereik Februarie 2016.
- 19.2 Bevestig die hantering van skuts wat reëls oortree en die gepaste optrede deur die baanoffisier – verwys na item 15.2 van die Handleiding vir Baanoffisiere vir “Prosedures i.v.m. die oortreding van kompetisie- en/of veiligheidsreëls” en item 15.3 van die Universele Reëls vir skietoefeninge.
  - 19.2.1 Die Baanoffisier **is die verantwoordelike persoon, het die finale gesag op die skietbaan en dit is sy plig** om teen onveilige en ongehoorsame deelnemers op te tree.
  - 19.2.2 Opdragte van Baanoffisiere moet onvoorwaardelik en onmiddellik uitgevoer word.
  - 19.2.3 Baanoffisiere moet uiteraard te alle tye redelik en professioneel optree, maar hulle moet nie huiwer om op te tree as daar oortreding van veiligheidsreëls, skietoefening- of skietkompetisie- reëls deur 'n deelnemer is nie.
- 19.3 Bespreek tipiese gevalle van reëls wat skuts gereeld oortree om die baanoffisiere voor te berei waarvoor hulle moet oplet, maar nie beperk daartoe nie:
  - 19.3.1 Vlakteskietoefening: 200m - lê met ondersteuning slegs voor
  - 19.3.2 Bosveld skietoefening – Vryhand staan - snapskote op 50m met geweer 45 grade na die grond gerig
  - 19.3.3 Meer as drie skote per afstand (oefening) waar net 3 skote voorgeskryf is

## 20. Inligtingsessies (*briefing sessions*) van deelnemers voor 'n skietkompetisies

- 20.1 Verduidelik die dagprogram en reëlins i.v.m. bv. die invul van vrywaringsvorms, inskiet van wapens, verversings, waar noodhulp beskikbaar is, ens.
- 20.2 Bevestig dat skuts die volgende reëls ken en antwoord enige vrae in die verband wat nodig mag wees;
  - 20.2.1 skietbaan veiligheidsreëls;
  - 20.2.2 skietoefeninge- en skietkompetisiereëls;
  - 20.2.3 vestig die skuts se aandag daarop, dat indien hy/sy op enige stadium twyfel oor enige van bogenoemde, die skut die baanoffisier/beampte moet vra vir die nodige inligting;
- 20.3 Samestelling van die Dispuutkomitee (wie is die persone wat op die Dispuutkomitee dien) en hoe hantering van dispute op die dag hanteer sal word.
- 20.4 Bevestig die hantering van skuts wat reëls oortree en die gepaste optrede deur die baanoffisier – verwys na item 15.3 van die Universele reëls vir skietoefeninge:
  - 20.4.1 Die Baanoffisier **is die verantwoordelike persoon, het die finale gesag op die skietbaan en dit is sy plig** om teen onveilige en ongehoorsame deelnemers op te tree.
  - 20.4.2 Opdragte van die Baanoffisier moet onvoorwaardelik en onmiddellik uitgevoer word.
- 20.5 Bespreek tipiese gevalle van reëls wat skuts oortree, maar nie beperk daartoe nie:
  - 20.5.1 Vlakteskietoefening: 200m - lê met ondersteuning slegs voor
  - 20.5.2 Bosveld skietoefening – Vryhand staan - snapskote op 50m met geweer 45 grade na die grond gerig
  - 20.5.3 Meer as drie skote per afstand (oefening) waar net 3 skote voorgeskryf is